

KRISTIAN THALAI PAWL CHALTLANG PASTOR BIAL



BIAL HUAP THUPUI ZIR
K.T.P. LEH ZIRNA

KRISTIAN THALAI PAWL
Chaltlang South Branch

Thawhtanni Zan Inkhawm
Ni 16.04.2019

KTP LEH ZIRNA

(*Chhiar tur: Thuf. 24:3-5*)

- Upa Dr. Lalnundanga

Thuhma:

Khawvel thang zelah nunphung pawh a lo danglam a, Darwin-a Theory lar tak pakhat '*Survival of the Fittest*' an sawi ang in nun khawchhuahna tur atan inelna a sang ta hle. Hetih lai hian Presbyterian theology innghahna pakhat chu Pathian in mihring hi a mamawh a siam zawh vek hnuah a siam chauh a, chuvangin '*Pathianin mihring hi rethei turin a siam lova hausa sain a siam*' tih hi a ni. Protestant Kohhran din chhuaktu - Calvin-a te leh Luther-a te zirtirna kan en chuan ringtu chu '*a taima tur a ni a, a in todelh tur a ni, chumi tur chuan a thiam tur a ni a, hna pawh a thawk nasa tur a ni*' an ti. Kan thupui zirtur hi Presbyterian innghahna te, KTP innghahna leh thil tum te rilru a riak reng chungin zir thei ila a duhawm hle ang.

Thalaite:

Khawvel huapah chuan kum 14-24 hi thalai ti a sawi a ni a, mahse kan ramah chuan kum 14-40 inkar kan la hmang reng. Pathian thu a kan hmuh mak tak leh danglam tak chu thalaite chauh hi Pathianin nun chen tura a tih a ni. Hei hian khawvel thilah leh Pathian lamah thalaite hlut zia leh pawimawh zia a ti chiang. Khawvel pumpui kan thlirin thalai khawvel a tih theih, khawvel hmun dangah chuan thalaite hi an pawimawh leh an hlut dan angin an nung ti ila, tawngkam dangin an '*chhenfakawm*'. Kan ram thalaite hi kan '*chhenfakawm*' ve em? tih erawh in zawh a tha awm e.

Zirna:

Zirna (*Education*) hian mihring nun pumpui a huap vek a. Zirna chuan lehkhabu atanga thiamna (*degree*) neih mai nilovin, hriatna (*knowledge*) leh themthiamna (*skill*) neih tirin, chumi hmang chuan mi rilru a ti hausa a, mahni in rintawkna nen, a theihna inphum bo mai tur a hai chhuah sak a, midang hriatthiamna leh midang tanpui duhna te siam sakin, mimal, chhungkua, khawtlang leh ram tana chhenfakawm ni turin a buatsaih a ni.

Zirna pawimawhna:

Zirna chuan nun pumpui a huap avangin mi puitling, hmantlak, rintlak, chhawrlak, rawngbawl tlakah min siam. Kan ram dinhmun mai pawh thlir hian nuna harsatna tawh kan buaipui tam ber te hi zirna bansan an ni deuh zel. Chuvangin khua leh tui tha ni tura min buatsaihtu tangkai tak a ni.

Nelson Mandela chuan '*Khawvel tidanglam thei hmanraw chak ber chu zirna hi a ni*' a ti. Zirna atanga kan neih '*hriatna*' (*knowledge*) leh '*thiamna*' (*skill*) hi '*thiltihtheihna*' (*power*) a ni. Hman lai chuan tharum chakna hi thiltihtheihna a ni a, an ngaisang bawh a, a pawimawh em avangin finna, thiamna leh zirnate hi ngaihpaawimawh ber a ni ngai lo. Tunah erawh chuan tharum hi thiltihtheihna ber a nih tawh loh avangin mi pian tha leh sek pui pui, chak leh huaisen pui pui te pawh hriatna leh thiamna avanga thiltihtheihna nei, awm nem zawk te hnuaiah an zawr hnappawh mai a ni.

Kristianna atangin:

A chung a tarlan ang in, zirna chuan rilru leh ngaihtuahna than lenna lam a thlir pui ber a, kristianna atang erawh chuan taksa, rilru leh thlarau a khawih. National Ecumenical Policy on Education chuan '*Mihring chu hriatna leh finna pangngai piahlamah chatuan Thutak Isua Krista a lo lang lamah a hruai lut a - hmuh theih malsawmna piahlamah nun dan tha, chatuan nun, Krista chu a keng tel a ni,*' a ti.

KRISTIAN THALAITE TANA ZIRNA PAWIMAWHNA:

1. **Pathian thu hriatfiah nan:** Isua Krista rinna leh amah anna kawnga mi dangte hruai tur chuan Isua Krista hre chiangtu, rinna a dingnghet nih a ngai ang. Mi thenkhatin Pathian thu chu thu nung a ni a, hrilhfiyah thiamna lam aiin nunpui fiahna lam a ni an ti. A dik ang, mahse kan hriatfiah loh hriatfiahna atan zirna a pawimawh. Tunlai khawvelah finna leh hriatna a thang nasa hle a, thil reng reng hi chiang taka hriat kan duh vek tawh, kan dilchhut sawt viau, thil tha tak pawh a ni awm e. Chuvangin mite hruai tur chuan mahni ngei hi kan chian, kan fiah hmasak a ngai. Presbyterian Kohhran hi thurin fel tak nei a inzirtir kan ni, mite zirtir chhawng thei khawp a thiamna leh hriatna hi KTP te hian nei vek thei ila a van hlu dawn em.

2. **Rawngbawlnan:** Rawngbawlina chi hrang hrang a awm. Tunlaia Chanchin Tha hril rawngbawlina pawimawh leh tangkai tak chu 'tent making ministry' a ni. Hnathawk chung a rawngbawl. Ram dang chu sawi loh, India ram chhungah mai pawh hian Chanchin Tha hril tulna a nasa hle, thiamna avanga kan thawhna theuhah Chanchin Tha hriltu tangkai tak kan ni thei vek. Central/Civil service leh a danga lutte hi rawngbawlina kawngah an thawh hlawk hle. Hnam hnuai hnungah Chanchin Tha kan hril ber a, hnam changkang leh hnam tha lamah erawh kan la tla na vak thei lo, a chhan lian tak pakhat chu an zawlpui rawngbawltu kan neih loh vang a ni pakhat. An zawlpui emaw, an chung en hial rawngbawltu nih theihna remchang tak pakhat chu thiamna sang zawk atanga nihna kan luah hi a ni.

ENGTINGE TAN KAN LAK ANG?

1. **Ruahmanna fel neih:** Mizote hi hmathlir kan nei thui thiam lo. Thil kan ti dum a, ruahmanna fel leh tha nei mang lovin kan ti leh mai thin. Zirna kawngah pawh hian kan kawng zawh tur tak hi kan siam fel har khawp mai. Kan exam a, kan pass ve leh mai thin a, pawl kan sawn a, kan zir zawm ve leh zel mai thin. Hnam dang ho hi chuan a tlangpuiin Matric atang hian an kawng zawh tur an lo thlang fel diam tawh thin. Nih tum ngaihtuah chawp a ngai, hobby ngaihtuah chawp ngai bawh. Mahni a tum leh ruahmanna fel neih aiin media lama langsar apiang kan tuipui mai emaw tih mai tur a ni. I nih tur i chian loh pawhin i nih loh tur tal chiang rawh. I tih tur i chian loh pawhin i tih loh tur tal chiang rawh. I thawh tur i chian loh pawhin i thawh loh tur tal chiang rawh.

2. **Ngaihhlut zawng tih danglam:** Mizote rilru put hmang chu a thlawna dawn, thawk lova neih, tlemte thawha neih teuh, reilote chhunga hausak thut, zir mang lova tha deuh a pass - a tunlai tawh vak lo. Kan khawvel hman mek hi in tlansiakna khawvel a nih avangin thiam tur a nih chuan thiam hle, neih tur a nih chuan neih teuh, thawh tur a nih chuan taima taka thawh, tih tur a nih chuan hneh deuha tih a ngai tawh a ni. Hmana ti ve thei sawih sawih tan hmun a awm tawh lo. Thawh mang lova nei teuh te ngaisang lo ngamin, rim taka thawk a hlawhtling te ngaisang thiam ila, kan danglam phah ngei a rinawm.

3. **Tumruhna/Taimakna/Teirei peih:** Tunlai zirna kalphung hian hma a sawn viau, fail hi thil harsa tak ni zawkin a lang, mahse kan tumruhna leh taimakna hi a chau viau tawh a ni mai thei, hlawhtling zo lo leh chawlh san (dropout) kan pung sawt hle. Tunah hian ram pumah thalai (kum 18-23) zirna a in ziak lut (Gross enrolment ratio-GER) hi 25.2% a ni a, khawvel hmun dang ngaihtuah chuan a hniam hle, China 43.39%, USA 85.8% a ni. India ram chuan 2020-ah target neihin GER hi 30% tal thlen tumin nasa takin a bei mek. Mizoram hi kan GER chu 24.5% chauh a ni. Chuti a nih chuan KTP rual zingah 73.5% chuan lehkhah kan zir tawh lo tihna a ni. Hemi kawngah

hian mipa lam kan in enchian a ngai zual awm e. Mipa tam tak hi chu thiam loh vang pawh nilovin taihmak loh vang, teirei peih loh vang mai niin a lang. Hmeichhe lam hi an ngaihsan awm phian. Pathian thu a kan hmuh angin taimak kawngah chuan thatchhiat loh a tha ber.

4. *Hun hmanthiam/hman that*: 'Hun hi tangka a ni' tih an sawi uar lai khan kan hrethiam pha vak lo. Mahse tunah chuan hun hlut zia kan hre ve ta viau. Nikhatah darkar 24 theuh kan nei. Darkar 8 hi mut nan a tawh, darkar 8 dang chu kan hna nghet (*profession*) atan, a bak darkar 8 la bang hi a pawimawh. He darkar 8 kan hmandan hian kan nun thui takin a hril, hmang tha leh hmangthiam apiang an vanneiin an ding chang dawn a ni. Kan hun hman dan hi kan chhut chian a ngai khawp mai. Electronic media in min luhchilh hneh hle, kan buaipui a, kan tuipui a, kan atchilh a ni ber, hei hian kan hun tam tak, hlawkna awm si lovin min khawhrat tir nasa hle. Hun hmanthiam inzirtir thar a tul hle.

Zirna leh KTP rawngbawlina:

Zirna hi rawngbawlina a ni tih hriat a tha. Kan zirlai kan fail hian rawngbawlina kan hlen lovah in ngai ila, thahnem ngai leh zualin hlawhtling ngei tura beihnawn hreh lo ila, kan hlawhtling ngei bawh ang. KTP rawngbawlinaa tel hi zirna kawnga min ti bahlahtuah kan ngai tlat a, nu leh pa te pawh hian fate KTP a in hmang rih lo turin an ti fo thin, he ngaihdan hi chhut chian a thiah a ngai a ni. "Miin khawvel hi a pumin nei sela, a nun chan si sela atan engnge sawt ang?" "A ram leh a felna chu zawng hmasa zawk rawh u, tichuan chung zawng zawng chu a pek belhchhah dawn che u nia".

KTP a active taka in hmangte hian lehkha pawh kan thiam tur a ni, chu chu a Pathian thu em em a ni tih hi in zirtir uar a ngai. A chung a kan tarlan ang hian hun hman thiam erawh a tul hle thung. Lehkha kan zirlaiin KTP leh kohhranah theih tawpin kan in hmang ve thin, kan KTP Leader chu hun a hmangthiamin a entawn tlak hlein ka hria, rawngbawlinaa a mawhphurhna a hlen tha, hma hruaitu a ni thei reng, chutih rualin zirna lamah pawh hma hruaitu a ni, thiam thei a ni hran lo, mahse a taima, a tum a ruh, hun a hmang thiam. Lehkha zir nan hunbi a ruahman lawk vek thin, a hun lo ruahman tawh kha KTP/Kohhran thil tih avanga a bawh pelh chuan a zir hun a pawtsei mai. Rawngbawlina hlawhtling Lalpa lawmtlak a thawk a, chutih rualin zirna lamah pawh a thiam berte zingah telin hna zahawm tak a thawk a, nemngheh rawngbawltu a ni ta. Zirna leh rawngbawlina hi a in kalh lova, in kawp rem takin a kal thei a ni tih hi ring hlel lovin in zirtir uar pawh a tul hle awm e.

Tlangawmna:

Zirna hi kan nun atan leh rawngbawlina atan a pawimawh em avangin induhsak ila, intanpui tawn ila, infuih sauh sauh ila, zir ngawrh a tul hun laite hian in phut tlat lovin, in hriatthiam pui ila, midang phut rana rawngbawl te pawh hi mahni in hrenna mai a ni duh. A tul hun a in awl, a tul hun a tanrual thiam a pawimawh hle. Hetih rual hian hlawhtling bik reng tur erawh kan ni lo mai thei, kan hlawhtlin chapo pui lo in, hlawhchham chang pawh a awm ang, hei pawh hi Pathian thil tho a ni, mahse beidawng mai lo in, thahnem ngaihna leh tumruhna thar min siamtuah hmang hlauh ila, kan la hlawhtling ngei ang tih rinna nen hma lam panin i kal zel ang u.

Sawiho tur:

1. Zirna hian rawngbawlina a nghawng theih dan/rawngbawlina hian zirna a nghawng theih dan han sawi ho teh u.
2. KTP/Kohhran hian zirna hi ngaipawimawh in kan hria em?
3. Zirna kawnga hma kan sawn theih nan engtia tan lak nge tha ang?
4. Zirna leh rawngbawlina hi engtinngeng inkawp rem takin kan kalpui zel theih ang?